

2 Timoti

Paul letawa natawa Timoti mampe girumalena

¹ Ne Paul ipa Keriso Iesu aposeliwa dea God insaisawa rua. Me ne waaubanena, inaida me sauawalena no Keriso Iesu bedewe donsata, benemawantepina baiwa.

² ☆ Ne nuana otopaida Timoti, e manawo ne leta ema girumantedina. No Mamamba God ita Tatamba Keriso Iesu sau amonawa euwa, mo nuapareu e baia ita wanwan euda eneempa! Niapo!

Paul Timoti wasauwa gagalowa wade

³ Ne God auwasadina, mida ne nuana uduudu mampe simbiasadina, nosinosina dewantoiena rua. Ita mai dima da ne nuana wawusaipona, dia. **Ne walama uduudu rauparina bedewe e insaedine ita God auwasadina.**

⁴ Ne e eedino ke waana insedine ita menaidandia e ibuaida ewape nuaeu nuana nopesapona.

⁵ ☆ E Keriso bedewe sumanaia ulaipaida ituiana ne insedina. Bauta e ataa Lois ita inaa Eunis sumanai inainamba ema rua bedewe waimoie. Ita ne atenten e sumanai inainamba ema rua deawaa bedewe wainiana.

⁶ Sa baiwa ne dieedina ne witana e osoawo itudino God amonawa euda nolaa baiwa eneena ideita dewasano impe winompa.

⁷ Ema dewasana, ipawa **God me Aleupa kakaiwa nenena, no mukaida, nuawadawada ita insaisa dodomana onioniadewadewa bedewe wainentaa baiwa. Me Aleupa mai de-wanepio santonta ba malantonta, dia.**

⁸ **Sa baiwa Tatamba Iesu benemawa sabamo wawawa mai malaitaa, dia.** Do ne Keriso baiwa diburantena mai malanaitaa. Tane ne do Gagalo euda baiwa God mukamba nenedia bedewe poka etonta.

⁹ Me no inanene ita apanena me meba apanawaida kakaibu wantaa baiwa. Me mai no dewamba da euda baiwa inanepona, dia. Tane me meba insaisawa bauta ituna ita nuawadawadawa amonawa euwa nenena mampe inanen. Amona euwa ema God tawo segasia walamawe Keriso Iesu bedewe dewasane no baimba itun.

¹⁰ **Tane tauma me ina amonawa ema no Inawamba Keriso Iesu wisena bedewe sabamolene ulaipalen. Keriso, me ipa bo mukawa diasan. Ita me Gagalowa euda bedewe inaida winakasala sabamosan.**

¹¹ ☆Gagalo euda ema benemawantepine ita waeuwantepina baiwa God ne sonabanene aposel nolawa nen.

¹² Dewa ema baibu ne dibura bedewe poka etedina. **Tane ne mai malanteipona ba nuana pola waipona, dia. Ipawa ne atenten mida ne sumanaiwantedina, me ipa onionia mamba euda.** Do ne badowa insedina sumanai nolawa nena me meba oniempadewalempo wiwisa walamawa wisepe.

¹³ Timoti, Gagalo euda dodomana waeuwa ne e dieena, sa ipa eueuwa e ruawaitaa baiwa. Waeuwa ema badowa wadaitue nolawaitona, tane do sumanai ita nuawadawada Keriso mampe no wadatana bedewe wankasaitaa.

¹⁴ Gagalo euda waeuwa dima God e witaa-wosana Aleu kakaiwa no bedembo wandia mukawa mampe gonaaite oniadewasamoa.

¹⁵ E ateiten sumanailala uara Asia tawowa bedewainta waimoia, mo bedeuwo Pigelus ita Imogines do, ne dabuaneane eneiena.

¹⁶ Tatamba Keriso no sumanai somba Onesiporus duwa bedewe wanwanlala do nuapareulepie saumopi, ipawa me walama uduudu ne saunedie nuana eusadie. Do ne dibura bedewe seni do wainedino me mai ne malanalepona, dia.

¹⁷ Tane me Rom bedewe wisena walamawe tauwadea os ne banunedie doinen.

¹⁸ Timoti, e ateiten ne Epesus bedewe wainedino ambi me ne simbianen. Ne rauparintedina Tatamba me wiwisa walamawe Onesiporus nuaparewalepie inasapi.

2

Keriso nolawa dewalala apanawa gagalou

¹ **Tane e Timoti, ne otona, Keriso Iesu bedewe sau amonawa wadatana bedewe e mukamukaua badowa enone nolaitona.**

² Gagalo euda waeuwa apana uduudu danauwo benemantedino e etaana sumanai sosoa dodomana e sumanaibuitiana waeuwadewasamoe witaposaa. Mida e inseiana mo sosou da waeuwamopua rua, mo enitumowo dewasapu.

3 E Keriso Iesu sorodia euda wanaitawo no do poka etonta.

⁴ Tane ema epe insena: Sorodiaida ona baiwa nolaleidie menasadia me oniedia apanawa nu-awa eusampa. Sa baiwa me mai meba bolawa nolawa insaisawaleipona, dia. Tane me ideita dima nolawaleidia sa os bedewe insaisawa itudie nolaleide.

⁵ Do apana owa bedewe weuwadia me ideita owa anaanawa ruawalempa weuwampa. Me epe dewalempa ompa osowe wisepie unewa eudida wadepi.

⁶ Irai apanawa nola pokasana me ideita uwauwa walamawa wisepio me mebaawa bauta uwauwalepi.

⁷ Timoti, dima ne dieedina insena, ita Tatamba e dewaepio gagalo babau ema ipauida ateitaa.

8 Iesu Keriso ambi dewalena kainokaino insene poka bedewainta aitona. Keriso, me ipa warere Dawid damba bedewe mulen, ita me ideita poka etene bolen. Tane bolala bedeuwo God me inasano enenwisen. Dima ne mape wadina, sa ipa Gagalo euda ne amonantedina ruawa.

⁹ Ne do Gagalo euda ema baiwa poka etedina, ita kadi dewalala ruau seni mampe tauneieno dibura bedewe wainedina. **Tane God aiawa mai mida taupidodepia rua, dia!**

10 Ne ideita poka etepina God apanawa sonabalala baibu, mo do Keriso Iesu bedewe inaida sapawa winakasalala wadapua baiwa.

¹¹ Aia ema ipa ulaipa, sumanaiwalala:

“No Keriso Iesu do bontena baiwa no me do wankasantata.

12 ✨No poka etonte antonta
no me do dewa uduudu oniamota.
Tane no me dabuasate wakoawa wata,
me do no dabuanepie wakoamba wapi.

13 No dima Keriso mampe sauawantena adianana
sate eta, tane me dima sauawalena mai
epia rua, dia. Ipawa God me meba bedewe
ulaipa os winede, mai me meba dewawa
epie lagawa wapia rua, dia.”

14 Timoti, gagalo ema wane sumanai sosoa nuau
itune badowa Tatamba emawe diamowo mo mai
aia isiwa ipawaida baiwa diadiantompa. Ne ema
epe wadina, ipawa dewa ema bedewe mai dima
da euwa segasaipona, tane apana asisulala di
kadimoi.

15 **Sona, badowa enone nolaitona, God e
asoa wapia baiwa. Ita nola dewalala euda
wanaite God aiawa ulaipa dodomana os
mampe waeuwaitona, mai apana mida no-
lawa malawaleipona rua.**

16 Warebasa gagalowa ipasia sawaite ea, ipawa
gagalo sa apana banlakadisamodio God adi-
ananasaie eidasai.

17 Mo waeuwau ipa ewaewawa bene deba-
maleidie ete kadisadia rua. Apana laga gagalowa
ema waeuwantoia bedeuwo ipa Imeneus ita Pile-
tus.

18 Mo nata ulaipa sumanai intawa enaiane wa-
iase, “Bo bedewe enawisa walamawa aitamana
wisen, mai ando segalepiama, dia.” Mo epe waie
apana isiwa sumanaibu bagorei.

✨ 2:12: Matiu 10.33; Luk 12.9

¹⁹ Tane God aiawa ulaipaida badowa enede, seu debama du awanediposidedia rua. Seu ipa sa osowe girumalene wadiase,

“Tatamba apana mida me mampea atemba.”

Ita do girumalene wadiase,

“Apana mida Tatamba ebowa wasabamosadie sumanaiwaleidia, me ideita kadi dewawa eidasapi.”

²⁰ Waeuwa ema wapo insea: Du debama bedewe puraiwa inainambu daitada winamoi. Isiwa gold ba silwa mampe dewalala, tane isiwa ia waiwaisalala, ita da ontaida. Puraiwa isiwa walama debama os bedewe wadompe nolawantompaa, tane isiwa walama uduudu otamompe nolawantompaa baiwa winamoi.

²¹ Epe rua deawaa, apana mida waeuwa nambea lagawaa ne umanawa wadina mai bedeweleipe dewawa rua dewasaipona, me du puraiwa dea eudida rua. Me ipa kakaiwaida Tatamba mampea ita God me dewasapio dewa eubu dewamopia rua.

²² Ne otona Timoti, e seda emadembu waninau kadiwa mai bedeuwoitaa, ea. **Tane e dewa dodomanau eubu, sumanai, nuawadawada ita wanwan euda obasa nuau uduudu mampe baiwaitone mo mida nuau dodomana mampe Tatamba bedewe sumanaintoia ruauitona.**

²³ Gagalo ipusia insakoa mampe di wawala sawaite nambeitaa, ipawa e ateiten gagalo inainamba sa ipa nuakadikadi aiawa wadedio odede.

²⁴ Tatamba nolawa dewalala mai nuakadikadi aiawa wampa, dia. Tane nuawa euda mampe

sosowa isiwa do deantompa, ita nuawa aiaisiwa dodomana os sosowa waeuwamompa.

²⁵ Mida me waeuwa amboitusaia me nuawa bibia mampe wadodomanamompa, naita God mo baibu walama itudiawo mo kadi bedewe insaisau leusapue dodomanantopu ita ulaipa gagalowa atentopu.

²⁶ Ita do mo leuntopue insaisa dodomana in-sepu. Ema bedewe kadi mamba Seitan karowa mo wadaitumono me insaisawa dewasaia epue inantopu.

3

Walama ompa dewawa gagalowa

¹ Gagalo ema do ateite insenadewaitona: Walama ompa oowe sumanailala baimba poka daitada walamawa segalepi.

² Walama sawo dewa inainamba ema epe rua apana dewamompa: Mo muba os bai-buntompa, mane os insaisawantompa, segaran-tompa ita di asowawantompa, sosou wakadis-amompa, mo gombau aiau etadabuamompa, sosou mai auwamompa, wanwan kakaiwa euda mai insepui,

³ nuawadawadau obasalepi, insadabua dewawa do dialepi, kutun wampa, nuasigasi-gantompa, wanwambu rebarebaida waimompa, dewa euda dewawa dabuamompa,

⁴ di sauakoakoantompa, tauwadea os nu-akadikadintompa ita muba di ituposintompa. Mo God adiananasampe ete ewanuauwa os nu-awadawadasampa.

⁵ Mo God simbia nolawa onapea dewasaia ewaewawa abo ulaipaida, tane mo dewau sabamomode God mukawa mai atentoipona. Apana inainambu sa mai bedeuwoite dewau rua dewasaa, dia.

⁶ Mo bedeuwo apana isiwa laga mampe du bedewe odeie antoie ita ioto insaisau oauara banlakadisamoi. Ioto sa muba kadiu saiwa awaneie ete ewanuauiwa taudomodua asiasi antoi.

⁷ Mo walama uduudu aten wadapona menamodio baiwantoi, tane ulaipaida mai donsapura rua, dia.

⁸ Mapo wene apanawa Ianes ita Iambires Moses amboitusaiena rua deawaa laga apanawa ema ne umanau wadina ulaipa gagalowa amboitusai. Mo insaisau koakoa ita sumanaibu oauaraida, mai ipuipua segaleipona, dia.

⁹ Tane mo dewau ema mai dewasapue akasantopu, dia, ipawa apana uduudu sabamo ewamopu ambi mo koakoauida waimoi. Dewa ipa deawaa Ianes ita Iambires mampo segalen.

Paul Timoti wabadosade

¹⁰ Tane e Timoti ne waroroneie dewana uduudu ewaana. Ne waeuwana, wanwana, ne dima baiwantedina, sumanaina, insaisana obasa, nuawadawadana e ateiten. Ne poka bedewe badowa enane anten.

¹¹ ☆Apana ne kadineiena, ita do ne poka saiwa daitada etana. E uduudu dima ne mainawo bola Antiok, Aikonium ita Lisitira bedeuwo segalena e ateiten. Sape ne poka rebarebaida etana. Tane

☆ **3:11:** Aposel 13.14-52; Aposel 14.1-7; Aposel 14.8-20

Tatamba poka ema uduudu bedewe ne saunene inanen.

12 Ulaipa, apana mida Keriso Iesu bedewe wanwan euda God menasadia ruawa bai-waleidia, me ideita poka etepi.

13 Tane apana kadi dewalala ita laga mampe debamantoia apanawa kadiwa dewasaie kadi-idantoi. Mo sosou isiwa lagamoi, tane mo muba do banlakadisalala wawentoi.

14 Tane sona Timoti, e ulaipa gagalowa ne waeuwaeno sumanaiwaitene ateitena bedewe wanempa. Epe dewaitona, ipawa e ateiten mida e waeuwaen.

15 Ita insea e oto kerauda wainiana walamawe e gagalo kakaiwa buka bedewe girumalena ateiten. Gagalo sa e waeuwaepie insaisaa dodomanasapio sumanai mampe Keriso Iesu bedewe inaida don-saa.

16 Gagalo kakaiwa uduudu buka bedewe girumalena, sa ipa God insaisawa ulaipa wano etane insaisau bedeweleno inseiena rua girumantoiena. **God aiawa, sa ipa eudida sumanai waeuwa baiwa, do kadi nibuasampe empaa baiwa, ita do dewa kiokiowa dodomanasampaa baiwa, do wanwan dodomana intawa waeuwalempaa baiwa.**

17 Ema bedewe God apanawaida dewa eubu daitada dewamompaa rua os.

4

1 Timoti, God emawe ita do Keriso Iesu emawe ne gagalona ema wadina. Me wisepie apana inawaa wanwanlala ita bolala do kotumopi. Keriso

wisepie warerelepia baiwa ne gagalo ema bad-
owa dieedina.

² Apana God aiawa menamompo wadompa, ba dabuantompe empa, e ideita amonaitona. In-saisaa aiaisiwa ita waeuwa dodomana mampe sumanailala wabadomona, ita kadi dewawa mo dewasaia amboitusana.

³ Epe dewaitona, ipawa walama iedia bedewe apana ulaipa waeuwa etaetawa dabuantompe ita mo muba insaisau rua dewasampa. Sa baiwa mo waeuwa apanawa nambea uara apamopuo wimpue dima mo etaeta menaidamodia diade-wasamompo etompa.

⁴ Mo ulaipa waeuwa intawa etaetawa dabuantompe laga duduna tontau etaetawa menamompa.

⁵ **Tane Timoti, e dewa uduudu bedewe insaisaa dodomana mampe eba onioniade-waitaa. Poka etone mai etedabuaitaa, dia. Tane ideita Gagalo euda amonaitona, ita dima God e witaawosana deaitopa nolawait-ona.**

⁶ Epe dewaitona, ipawa ne osinana pulo rua wata osowe memepuaubepu ita ne bonteape tawo ema epaa walama wisede.

⁷ **Ne owa bedewe euda os weuwadinee ompa osowe winene diasana. Ita do sumanaina bedewe badowa enane nolawanten.**

⁸ **Tauma uwa benawa uwatauwaita ne baina imaala winede, sa ipa apana mida God mampe dodomanantoia mo os uneu.** Tatamba Iesu Keriso mida apana uduudu dodomana os kotumopia, me walamawa debama sa bedewe un-ena nepi. Mai ne os, tane mo mida nuawadawada

mampe me wiwisawa onioniawantoia do uneu wadapu.

⁹ Timoti, inta banusae tauwadea mainawo winea,

¹⁰ ✧ipawa sona Demas tawo ema ewanuaauwa nuawadawadasane ne enene Tesalonaika bedewe alen. Keresens do enene bola Galasiawo alen, tane Taitus bola Dalmatia bedewe alen.

¹¹ ✧Luk os ne nata mape wainitana. Somba Mak banle nata winlena, ipawa me nola apanawa euidida, ne saunepie nolalepia rua.

¹² ✧Ne Tikikas wanaubeno alen Epesus bedewe.

¹³ ✧Timoti, e ione baiwa ne garana onapea Tiroas bedewe Karipus mampe ena wade do winea. Ita bukana do ote winea, tane menaidane-dia bukana pue etepa mampe dewalala mai emoa.

¹⁴ ✧Alekisanda, irama dewala apanawa, me ne kadiidanen. Ne mai sipoasapa, dia, tane Tatamba os me dima dewasana sipoasapi.

¹⁵ Alekisanda no Gagalomba euda aia badowa mampe amboitusan, sa baiwa Timoti e do me ewonadewaitona.

¹⁶ Ne kotuna bautaa bedewe neba wasauna wadino mai mida da adinawolepona, dia, udu-udu ne eneane antoiena. Mo baibu ne menanedia God mo kadiu mai insepi.

¹⁷ **Tane Tatamba Iesu Keriso me meba ne tainawolene muka neno Gagalo euda uduudu amonanten, uwa daitada apanawa etapua**

✧ **4:10:** Kolosi 4.14; Pailim 1.24; 2 Korint 8.23; Galasia 2.3; Taitus 1.4 ✧ **4:11:** Kolosi 4.14; Pailim 1.24; Aposel 12.12,25; 13.13; 15.37-39; Kolosi 4.10; Pailim 1.24 ✧ **4:12:** Aposel 20.4; Epesus 6.21,22; Kolosi 4.7,8 ✧ **4:13:** Aposel 20.6 ✧ **4:14:** 1 Timoti 1.20; Rom 2.6

baiwa. Do ne kotu bedewe boneapona tane Tatamba inanen.

¹⁸ Ita Tatamba Iesu ne kadi uduudu tauma amboituneia bedewe saunepie euwa os me gonaawa uboa bedewe odapa. Me mampe sapaida ande ita ando winakasala, ulaipa amen!

¹⁹ ☆Ne auwana wadinaaubedina sumanai sosona Pirisila ita Akuila nata mampo. Onesiporus duwa bedewe waimoia apanawa do auwamodina.

²⁰ ☆Erasitus ipa Korint bedewe wankasalen ita Tiropimas kero wadena baiwa Mailetus bedewe ena.

²¹ Timoti, obasa walama wisepia sawa eba inta banusae tauwadea winea. Sosomba Eubulus, Pudens, Linus ita Kilaudia, do sumanai sosomba isiwa ne do mape wainitana e auwaei.

²² Timoti, Tatamba e aleua bedewe saunepie muka eneeipi.

God amonawa euwa e manlawo winompa, niapo!

☆ **4:19:** Aposel 18.2; 2 Timoti 1.16,17 ☆ **4:20:** Aposel 19.22; Rom 16.23; Aposel 20.4; 21.29

Ina Sanaa Gagalowa
The New Testament in the Kanasi Language of Papua
New Guinea
Nupela Testamen long tokples Kanasi long Niugini

copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 26 Jul 2025 from source files dated 31 Aug 2023

b27bd40e-e091-5268-bcbf-8232e1d7501a